




De Contingency
Mar 1852

Volume 3rd 20th

Long - 1st 2. page Log - n. 7936

copy
9179



colle. 1678. 12

LETTRE
CONTENANT LE
CLAIRCISSEMENT DES ACTIONS ET
deportemens de Monsieur filz & frere
de Roy Duc d'Anjou,
d'Alençon &c.

*Tant pour le regard des choses qui sont auenues
es guerres ciuiles de la France, comme en ce
qui concerne le faict & deffence des pays bas
contre les Espagnols.*



A ROVEN.

Pour Iean Yforet. l'An 1578.

THE NEWBERRY
LIBRARY

Cote
F
39
326
1578
Au Lecteur.

A M I Lecteur, il m'est tombé entre mains vne lettre eſcrite par quelque personnage françois laquelle pour contenir la conoiſſance de beaucoup de ſecretes particularitez & l'eclairciſſement de pluſieurs doutes de tresgrande importance, m'a ſemblé deuoir eſtre miſe en lumiere. A ſin meſme que ſi quelqu'un ſçait que les choſes ſoient paſſées autrement qu'elles ne ſont racontées & marquees, il puiſſe y contredire, & par ce moyen en faueur de la poſterité rendre l'hiſtoire de ſi grans & ſi notables euenemens auenus en la perſonne d'un ieune Prince, plus certaine, plus vraye, & comme plus autentique. Quant à moy, ſi tu en veus auoir mon iugement, ie te diray, que ie n'y ay rien veu qui me ſemblast auoir quel que aliance avec la flatterie ou menſonge, & croy que l'auteur ne penſoit ni à flatter ni à mentir.

LETTRE CONTENANT L'ES-
CLAIRCISSEMENT DES ACTIONS DE
Monsieur filz & frere du Roy, Duc
d'Anjou d'Alançon, &c.



MONSIEVR le desir que i'ay de vous
satisfaire & vous tirer hors de dou-
te plus qu'aucune autre particulie-
re deuotiō que i'aye enuers le Prin-
ce des actiōs duquel vous voulez estre esclarci,
faisa que maintenant pour respondre aus deuz
lettres que vous m'auiez escrites sur vn mesme
sujet, ie vous en enuoyeray vne bien longue. A
quoy ie suis induit nō pour cuider que la verité
aye besoin de beaucoup de paroles pour vous
estre persuadee: ains plustōt pour ce que ie sçay
bien que vous cōmuniquerez la presente à plu-
sieurs de voz amis, & qu'ainsi courant de l'vne
en l'autre ez mains des hommes, elle pourroit
rencontrer des iuges fort fauorables qui fairoient
tomber le blame de ma briueté sur l'hon-
neur du Prince: qui par ce moyen pourroit
cy apres plustōt se plaindre de mon affection,

que de men scauoir aucū gré. Toutesfois ie n'ay
 délibéré de tant m'affujettir aus esprits conten-
 tieuz & plains de mauuaise penſee que de faire
 de ce familier deuis vu liure, cōme ſi je deuois
 entrer en diſpute avec eux. Car outre qu'il
 n'ya rien de ſi aiſé à la meſdiſance que de trou-
 uer entre pluſieurs actions argument de repren-
 dre, & ſe parer encor de belles raiſons, les dep-
 portemens des grans es affaires d'eſtat ſont d'au-
 tant plus ayſez à calumnier que moins ilz ſont
 conuz. Ainſi ayant à ſuiure vne façon de voye
 moitoyene i'ay mieus aymé pancher ſur la brie-
 ueté que de m'alōger, puis que i'ay maintenāt
 entrepris, non de perſuader les malueuillans,
 ou deſſaiſir de mauuaise penſee les deſfians &
 ſoupçonneuz, ains ſeulement vous eſcrire de ce
 que vous me demandez ſelō la portee de ce que
 i'en ay veu & ſçeu hors de tout doute. Or auant
 que d'entrer ſur les particularitez, ie ſuiuray l'or-
 dre de voſtre derniere, & parleray premiere-
 ment de la choſe en general.

Vous dites que les Princes & grans Seigneurs
 ſe trouuent en main quaſi des leur naiſſance,
 tout ce que les hommes ſouhaitent commune-
 ment

ment, pour deuenir bienheureuz, comme sont les honneurs, dignitez, plaisirs & richesses: mais qu'il leur reste encor vn point auquel sur tout, ils doibuent auoir le cœur & le pourchasser de tout leur pouuoir pour parfaire en eux le comble d'une heureuse condition, qui est de respandre de leur vertu & bonté vne bonne opinion entre les hōmes, & iouir au milieu d'eux de la douceur d'une belle & illustre renommee pour apres leur mort laisser de leur vie vne souuenance aussi recommandable à la posterité.

Ce qui a esté couché par vous non seulement en tresbons & graues termes, ains encor fort à propos: soit que vous l'ayez appris de quelqu'un des anciens, ou que vous l'ayez dit de vous mesmes. Sur quoy ie veux bien vous dire que la difficulté qui gist à gagner ce bonheur, faict que la pluspart voyans combien souuent il reussit au contraire de ceste louable intention & desir qu'ilz y auoyent apporté, fuyēt la peine & le soin qu'il y faudroit prendre: Soit que leurs cheuances & grandeurs leur donnēt de quoy se contenter, ou que les plaisirs sourciers de l'ame reiettent la contention d'esprit comme vne es-

pece de seruitude. Et que pourtant si ceux sont
 beaucoup à priser qui ont tousiour eu proposé
 deuant leurs yeus, vn si honnestebut, & ont
 pourchassé d'y paruenir: Sans doute ce Prince
 doit estre admiré en ce que de si bonne heure,
 & à peine sortant de son enfance, il a esté touché
 d'vne si genereuse ambition, sans pouuoir estre
 relasché ny par crainte ny par allechemens:
 & a toujours pensé à faire quelque chose non
 seulement grande & illustre, ains aussi vtile &
 salutaire à la france: ce que ie vous montreray
 tantôt. Et ores qu'il soit auenu qu'infinis ont
 parlé de ses depportemens, tout au contraire de
 ce qui en estoit, il ne faut pourtāt s'en esbahir,
 & moins apporter contre luy le preiugé d'vne
 trompeuse & soupçonneuse opinion: ains con-
 siderer que tousiours la vertu, quelque dignité
 qu'elle ait, a besoin d'auoir quelque bon ren-
 contre avec le tans auquel elle veut apparaitre,
 & avec l'opinion & iugement des hommes,
 au cœur de quielle veut s'insinuer & gagner
 place. Tellement qu'ores que la verité & la rai-
 son semblent estre descendues du ciel pour com-
 mander à tout: si est il certain que d'être les hom-
 mes

mes la plus part ne la conoissent, & que celuy
 fust sage qui premier deit, les choses bonnes ne
 pouuoir auoir vn pire iuge que la multitude, si
 non lors qu'elles ont prins aueu & autorité par
 la longueur du tans & par la contradiction. Et
 pour ceste cause ie croy que Monsieur, à la façō
 d'Aristides, s'il eust veu que le vulgaire eust sou
 dain approuué ses actions, eust eu occasiō d'en
 douter: tout ainsi qu'on raconte que ce person
 nage voyant que le peuple d'Athenes auoit
 trouué fort bō ce qu'il auoit proposé, se tourna
 vers ses amis & leur demanda s'il ne luy estoit
 point eschappé de dire quelq chose mauuaise
 & peu raisonnable. Ainsi ie croy n'y auoir dou
 te qu'il ne faille recuser le iugemēt du vulgaire:
 Mais pource que ie sçay q plusieurs qui portent
 le nō d'habiles hōmes & entēdus arraisonnent
 leurs souçpons de telle maniere qu'il sont creus
 de ceus qui n'ésçauēt autre chose, ie veuz dire en
 general pour leur regard que puis que la portee
 des affaires du mōde & le cōseil des sages tiēt ca
 chee, la conoissance du motif, inclinatiō & res
 pectsq diuersemēt se remōtrēt, on ne doit teme
 rairemēt iuger en la mauuaise part des grās, qui
 ne font

ne font tout ce que nous auons esperé d'euz, ou
mesme font quelquefois le contraire: ains doi-
uent se souuenir, que non seulement les plus
belles entreprises, ains aussi les plus genereuz
naturels de qui elles procedent, perdent leur
lumiere & splendeur obscurcis par la malue-
uillance & desfiance qui les enuirõne, tout ainsi
que toutes les plantes si au commencement el-
les sont broutees, ou estouffees, s'abbatardissent
& n'en ont iamais la croissance si belle ny la
feuille si large: veu que d'ailleurs toute actiõ est
despouillee de sa grace despuis que venans à la
faire nous y apportons de la crainte. Et est cer-
tain que l'assurance & prosperité qui embellit
les choses moins bonnes font celles qui ainsi
qu'un air frais & libre font leuer la teste aux bel-
les resolutions & proiects, les rendans agreables
à l'œil soudain qu'elles apparoissent. Or si ceste
consideratiõ est pleine de modestie, il y en a vn
autre qui l'est encor plus, & qui accuse à bon
droit le malheur de ceux qui ayans à faire de
grandes choses, & de grande importance, ont
pour le regard de leur renommee, à rendre cõ-
te ou à ceux qui voyans & comme regardans à
deux

deux yeus, ne voyent pourtant rien de ce qui se fait: & en oyans parler ne sçauent que bien peu au vray de ce qui est. Et pourtant comme nous lifons que Caton le Censeur apres auoir esté cét fois appellé en iugement, s'escria vn iour disant: O que c'est chose dure de rendre raison de sa vie aux hommes d'un autre siecle: ainsi à bon droit les Princes pourroint protester, que c'est tiranie que la fantasie des hommes occupe, puis qu'elle soumet leur honneur & reputation, ou à la malueillance de leurs plus grans ennemis, ou à l'opinion des autres, qui pour leur ignorance ne peuuent estre bons ni legitimes iuges de leur actions & de portemens. Et cest pourquoy auant que de particulariser, i'ay voulu dire ce qui me semble deuoir seruir de regle & admonition contre la mesdisance & licece de parler qui s'estend iusques aux pais estranges. A sçauoir que si nous voyons quelqu'un qui veuille iuger par cōiectures & raisons recherches, touchant le secrets, desfains ou volonté d'un personnage illustre & renommé, nous luy pouuons dire qu'il a bien raison de se retenir sur ses pas, & y bien penser, se souuenāt combien il est aisé en

tel cas de se tromper, & mesprendre. Ou si nous oyons racompter quelque acte moins honeste & moins digne de la grâdeur d'un Prince, nous deuons estimer, s'il en est rien qu'il ya quelque violente occasiō cachee au sein des affaires, qui estant conue viēdroit à le iustifier enuers nous: sçachans qu'il n'est pas mesmes le soleil qui ne fleschisse & biaise hors de la droite ligne, pour nous redre son cours plus salutaire & temperé.

Ou pour venir meshuy à Monsieur, & au commencement de son entremise aux affaires, vous sçauiez qu'ayant esté nourri avec ses freres souz l'esle de la Reine sa mere, il ioignit à son naturel comme vne accustomāce iournalliere de l'aymer, honorer & respecter: mais qu'au reste toute la Cour, & commel' image de l'autorité royale estant autour de la personne du Duc d'Anjou qui regne maintenant, il fust assez longuement mal suiuy, soit qu'il y eust en cela quelq secret de cour que nous ne sçauōs point, ou que sa ieu nesse en fust cause. Bien est il certain que dentre les grans, Messieurs de Montmorency furent les premiers qui se montrerent de ses plus deuotieux,

uotieuz, & se rengerent plus continuellement
 prez de luy : qui aussi apres les auoir gouttez
 montra combien il leur en sçauoit bon gré &
 les aymoît, non seulement par les caresses ordi-
 naires, & en les portât & fauorisant autant qu'il
 pouuoit, ains mesmes lors que le Ga au sortir
 de la maison du Marechal de Retz, osa biâ que-
 rer & menacer Mōsieur de Meru, & tirer l'es-
 pee sur luy : car Monsieur y accourut, & si deit
 outreplus au Roy à present regnant qui s'en sen-
 toit offensé, qu'il n'en vouloit point à ses serui-
 teurs, mais bien estoit amy de Messieurs de
 Montmorency. En cest acte ceux qui luy
 veulent moins de bien, reprouuent ce qu'il
 sentremit si aiseement d'vn tel differêt, iusques
 à mettre la main à l'espee, & que despuis encor
 il quitta plus facilement son offense, se con-
 tentât du pardō que le Ga luy en demāda quasi
 par force & en priué, tāt il estoit presomptueuz.
 Mais quant à moy i'ay touiour trouué qu'en
 vn tel blasme, gist vn grand & singulier los de
 trois vertus ensemble: & que par là il se montre
 que si despuis elles ont apparu en plusieurs au-
 tres de ses actiōs, elles n'ōt point esté fardees ou

empruntees, ains luy sont du tout naturelles, puis que deslors vn si chaud & genereux bouillon de ieunesse les meit en euidence. Je remarque ces trois vertus du nom de generosité, fidele amirié, moderation & prudence. Quant à la premiere ceux qui veirent combien gaillardement il meit lors la main aux armes, & ceux qui ont fçeu comme au siege de la Rochelle, vne fraieur soudaine ayant saisi les soldats qui senfuyoint des trenchees à vau de route, il print vn espieu sans s'estonner de rien, & se meit en estat de defense à l'entree de sa tente: ceux la dy ie confesseront, que ses premiers coups d'essay ne tiennēt rien de la legereté, ains d'vne fermeté de courage qui est nee avec luy. Au reste dauoir dez ce tans là commencé à aymer les siens si constamment, & si ouuertement, ie l'attribue à vne tresgrande bonté, d'autant plus louable que moins on a dit ceste qualité se rencontrer au naturel des grans Princes, aus quelz on ne donne point d'amitie, sinon autant quel'apparce leur en est proffitable. Que si on regarde les bōnes parties de Monsieur le Marechal, & de ceus de sa maison, on doutera si en telle amitie il y auoit plus de iu-

de iugement & de discretion que d'affection: tāt bien il sembloit auoir choisy ceus qui l' deuoit approcher de sa personne & conseils. Quant à sa moderatiō ie penseroiy ne la deuoir remarquer pour ce que le reste de sa vie en est plain: n'estoit que ses aduersaires veulēt faire croire qu'en pardonnant si aisement au Ga, il aye montré vn naturel qui se relasche tout soudain, & n'aye gueres de tenuë. Mais il me semble que telles gens se decouurent estre fort grossiers, qui en parlant ainsi, montrent ou feignent ignorer ce qui est par trop cōmun, à sçauoir que les Princes n'ont en rien le sentiment si vif & chatouilleuz, comme ilz l'ont en vne ouuerte offense, & n'oubliēt ou supportent rien moins que l'audace d'vn particulier & petit compaignon. Car comme aucune chose ne peut estre consideree en euz, qui leur soit si propre & si naturelle q̃ la grandeur, il n'y a riē aussi qui plus les aigrisse, que de se voir mespriser ou abbaïsser par l'insolence de ceus qui osent indignemēt en quelque maniere que ce soit s'apparier à euz. Ainsi c'est vne bien lourde merueille & fort peu croyable, de dire que ce Prince lors appaisé si soudainement ne s'en sou

uint plus. Et est bien plus vray semblable voire certain, que le respect qu'il portoit à son frere, & le regard de ce qui en eut peu auenir s'il s'y fust porté plus chaudement, luy donnerent en cest endroit l'honneur de s'estre gouuerné deslors tres sagement & moderement : soit qu'on attribue ceste prudence au conseil de Melsieurs de Montmorency ou qu'elle procedast de luy mesmes & de la Roine sa mere.

Peu de tans apres surueint ceste iournee de Jang qui a tant cousté à la Frâce: à l'entreprise & execution de laquelle ses plus grans aduersaires auouent qu'il n'y eut aucune part : Ains qu'au cōtraire le regret & desplaisir qu'il en a mōtré, a esté cause de toute la mauuaise chere, que le feu Roy luy en feit despuis. Voire mesme que le lōg deuis & communicatiō qu'il eut deus iours au parauant avec le feu Admiral, nō seulemēt fust cause de faire auancer ceste iournee, ains encor luy cuyda estre biē cher vendue & à tous les siēs pour l'amour de luy : Pource que lon estimoit qu'il eut esté deja tellement gagné, & si fort rendu affectiōné à ce parti, que de là on deut auoir
occasion

occasion de craindre qu'il n'en sen voulut apres resentir, & en garder en son cœur quelque desir de vengeance. Je le dy encor que ce soit chose asses conue, pource qu'ayant à vous dire mon auis du naturel de ce Prince, & s'il y peut auoir en luy aucun soupçon de cruauté, il me semble qu'il faut commencer à le considerer dez ce tanslà, pource que lors il estoit en l'age auquel les hommes decouurent plus les semences des vertus ou des vices qui sont en euz : Selon ce que les historiens ont fuiuy ceste façon de remarque, descriuans la vie des Rois & Empereurs de jadis, pour montrer que s'ilz furent ou vertueux ou meschans, ilz en auoint ia donné de tresgrâdes arres, par les bons ou mauuais deportemens de leur ieunesse.

Induit de cecy ie ne fay doute que si Monsieur eut eu, tant soit peu le naturel selon ou malin, il l'eut quasi par force decouuert en vne telle occasiō: & que pourtant c'est vne tresbelle assurance à ceus qui auront cest heur de le seruir, d'auoir à viure souz vn dous & debonaire maistre. Ce qui est en somme vn des principaus points pour redre, encor qu'il fust tout seul, les
serui-

seruiteurs & sugets heureux. Et si on adiouste les parties de liberalité, affectionnee volonté, rondeur, constance, & sagesse, que ie trouue n'estre moins apparentes en luy, sans doute ie croy que tous ceus, qui luy ont voué tant soit peu de deuotion, luy en donneront encor dauantage, ceus qui le desirent, le viendrôt trouuer, & ceus qui moins l'aymēt, l'ayans conu se donront du tout à luy. Mais tout est rempli de calomnies & mesdisances, lesquelles ne feroient aucunemēt de duree, si elles n'estoient soustenuës voire façonnees, par ceus qui ont tiré du preteste du seruice du Roy, & de la contention des guerres ciuiles, les moiens, la force & l'autorité de faire en France vn troisieme parti. Or pour reuenir à Monsieur, vous me demandez qu'est ce qu'il est de ce tans auquel il estoit reclos au chasteau du Bois de Vincées, cōme participant à quelque entreprise ou priuee, ou publique, & comment il endura, qu'en la personne de ses principaus seruiteurs, il fust quasi accusé, de ce qui leur estoit mis à sus, & que sa reputation en demourast honnie, non seulement enuers les estrangers, ains mesmes au cœur &
opinion

opinion des françois, dont infinis ont pensé ce qui n'estoit du tout point. Sur quoy ie vous respon, que depuis la prise de Mons & de Valenciennes, le Prince d'Orenge se trouuant affoibli de plusieurs pertes, & pour faire tourner visage à ses ennemis qui luy couroint sus, & en somme pour se maintenir avec ceus de son parti qui ouuertement ou secretemēt, s'efforçoint de secouer le ioug, & deliurer leur país del'insolence Espagnole: En tel besoin dy ie, il auroit ietté l'œil sur ce ieune Prince, cōme le sçachant n'auoir esté iamais amy de ses ennemis, & seroit entré en pratique & intelligēce avec quelques vns de ses seruiteurs, lesquels ou par leur faute, ou par le malheur qui auient souuent ez grans affaires, auroint si mal cōduit le tout, que le feu Roy en senteit le vêt, & comme celuy qui auoit esté nourri ez soupçons & desfiances des troubles de son royaume, pensa soudain que c'estoit non vn dessain de gagner quelque chose sur l'estranger, ains plustost vne menée domestique tramee contre son estat, & en vn mot vn nouveau flambeau de guerre ciuile. Tellement que recerchant de tous costez les auteurs de ce

C qu'il

qu'il craignoit, on luy meit en main deuz pou-
res miserables; qui se trouuerent plus accablez
de la desfaueur du tans, que condamnez par la
verification de leurs crimes: estâs d'ailleurs plus
oppresséz par le credit de leurs ennemis, qu'ilz
ne pouuoient estre pour lors sousleuez ou aidez
de l'amitié de leur maistre, quelque instance &
prieres, qu'il sceut faire pour les sauuer. Ainsi
on ne peut remarquer en ce Prince par cest eue-
nement aucun signe de deffaut de bonne vo-
lonté enuers ceus qui mouroint à son seruice:
ains au contraire il est certain, que combié qu'il
eut toutes les occasions de craindre, d'irriter
dauantage encontre soy le feu Roy son frere,
toutefois il n'obmeit aucune forte de prieres &
sollicitation, tant enuers le Roy que la Roine sa
mere, pour excuser ses seruiteurs, iusques à ce
que la mort meit fin à ses requestes & à leur vie
ensemble. Donc à tort ses malueuillans obie-
ctent ce qui est auenu aus siens, comme s'il n'en
auoit tenu conte, & les eut abbandonez, veu
qu'au contraire ny le respect de la desfaueur du
tans, ny la crainte de sa personne, ne peut sur-
monter ou retenir le cours & demonstration de
son

son affection. Quant au regard de sa reputation, quand ie considere comment il s'y porta lors, i'en demeure tout estonné, & iuge qu'aucun autre ne l'eut sceu conseruer en tel rans plus sagement qu'il a faiët. Car ny deuât ni apres la mort du feu Roy Charles, on ne peut dire que iamais il aye tasché de s'en aller ou prendre party, combien qu'il en eut infinis moyens: Voyant bien que s'il l'eut faiët, il n'eut peu eiter le blame des faus bruis qui couroint, & eut faiët encor pëser à toute l'Europe, qu'il eut voulu attenter quelque chose sur l'estat, & forcer les lois d'aïnesse qui rappelloint le Roy de Poloigne en ce royaume: combien qu'un autre que luy esmeu de ce qu'il auoit nagueres souffert, & souz le preteste de quereller la Regence contre sa mere, pendât l'absence du nouueau Roy, en eut faiët à mon auis tout autrement, & eût tout rempli de guerre & confusion. Or d'une telle moderation le fruit qu'il en a rapporté, est, que tout le monde & le Roy son frere, a conu qu'il n'auoit eu iamais rien de semblable en la pensee: veu que l'on sçait bien qu'il n'estoit ny retenu ny veillé de la Royne sa mere, comme si elle en eut

eu des fiance: Et qu'ores quil eut esté ainsi, encor n'eut il sceu auenir, que l'esguillon d'une telle ambition ne l'eusse faict hasarder, à entreprendre ce, qui eut esté vn auantage tresgrand pour tous ses ennemis, & perte irreparable pour luy & pour tous ses seruiteurs. Aussi est il certain, qu'être autres respects celuy de Monsieur le Marechal pour lors prisonnier ne l'esmeut pas peu: pource qu'il estoit bien certain, que ce poure Seigneur pris par soupçon neuses cōiectures eut semblé non seulement à ceus de ce siecle, ains à la posterité, auoir esté retenu par bones raisons & apparées fondees sur les actions de Monsieur, lequel on eut iugé n'auoir peu rien entreprēdre de hasardeuz, sinon qu'il y eut esté poussé, confirmé & adressé par luy & ses conseils. A quoy eut serui ce que i'ay dit, que ia despuis plusieurs anneés luy & les siens s'estoint régez prez de ce Prince, qui aussi ouuertement se disoit & vouloit estre estimé leur bon & affectionné amy. Je pèse donc que ceus qui cōsiderent ce que ie dy, & sçauent que quelque curieuse recherche qui fut lors faicte, on ne sceut tirer tant soit petite preuue de quelque mauuaise deliberation, ne deschar-

deschargeront pas seulement Monsieur de tout blâme de conspiration & menée contre l'estat, bien & repos du royaume, ce que i'estime estre meshuy par trop connu de tous: mais aussi luy donneront la louenge du plus genereux, sage, dous & moderé esprit, qui se puisse appercevoir en Prince qui aye esté il y a mille ans. On a remarqué toujours qu'ez nouveaus regnes il y a du changement, tant ez choses de la Cour, cōme au gouuernement du royaume: Si que coustumierement celuy qui estoit reculé, se trouue rapproché, & au contraire les fauoris esloignez. Mais sur tout c'est vn point certain que les Princes se vengēt de leurs offenses, & mesmes si le tās se rencōtre avec la minorité ou absence du nouveau Roy, comme il estoit auenu. Car c'est lors que les moins courageuz hors de tout dāger leuent la teste, demādans apres sans crainte d'estre refusez, & pour gage & obligation de leur fidelité, la permission de se venger de leurs torts receuz contre les courtisans, qui ont indignemēt abusé en leur endroit de leur credit & faueur. Et de faict qui eut pensé que Monsieur n'eut voulu en vser de mesmes, contre ceus qui auoient à

tort irrité la bonté du feu Roy contre luy? Et qui faict doute, qu'il ne luy eut esté bié aisé en si bel le occasion, de se rendre si fort, qu'on eut esté bien content de luy ottroyer ce qu'il demâdoit pour l'appaiser au commencement d'un regne si embrouillé d'affaires? Si donc il ne luy manquoit, ni cause, ni occasion, ni moyés, il faut par nécessité que ce qui le reteint, fust l'envie qu'il auoit de n'offenser en aucune maniere le Roy son frere: ce qui appartient à la modestie & douceur de son naturel, outre la preuoyance des grâs maus qui en eussent peu auenir, & du blâme qu'il en eut peu encourir enuers plusieurs, lesquels eussent attribué ce qui est du sentiment de sa grandeur indignement outragée, à un desir ambitieux & conuoitise de regner, & eut on incontinent publié par tout ces deuz vers:

*Celuy qui veut un royaume gagner,
Faut n'apoint de coeur pour regner.*

Je m'arreste plus longuement sur ce point, pour ce qu'à la verité il me semble admirable, & estre le vray fondement de ce que l'on peut dire, pour esclaircir les doutes qu'on a faict naistre es

estre es autres actions de ce Prince qui ont suiuy depuis: Soit que vous cōsideriez ce que i'ay dit, ou que vous preniez garde combien il y auoit occasion de penser, qu'il trouueroit le cœur du Roy son frere preueni de plusieurs mauuaises opinions, & que par ce moyen il seroit aussi mal que deuant, & viuroit avec desplaisir. Car encor que ce soient d'assez violentes apprehensions, pour esmouuoir non seulement vn foible esprit, ains les plus constans, toutefois, il se resolut à tous euenemens, & porter tout en patience, plustost qu'un telle crainte le rendit coupable de ce à quoy il ne pensa onques.

Ceste assurance & franchise de courage, me faict souuenir de la pieté de Titus filz de Vespasian, qui ayant esté aduerti que le bruit auoit couru à Romme, qu'il se vouloit faire Empereur, & que son pere en estoit entré bien auant en desfiance, il se meit soudain en chemin vers luy, & de tout loin qu'il le peut apperceuoir, & estre ouy de luy, s'escria luy disant, Je suis venu mon pere, ie suis venu: comme s'il eut voulu dire. ce n'est d'un tel filz que moy, qui viens me redre & comme planter mes bannieres à tes pieds, qu'il

qu'il falloit conceuoir quelque doute. Car aussi me sembler il, que le voyage de Monsieur vers Lion estoit autant, comme s'il eut annoncé par vn heraut: Ce n'est de moy qu'il faut craindre quelque remuement, puis que ie vien remettre ez mains de mon Seigneur & frere toutes mes offenses & aigreur, & vien ioindre mes forces & intelligence pour le rendre Roy paisible & victorieus.

Or cetans ayant esté suiuy d'une guerre & puis d'une pais, à laquelle vous mesmes me confessez que ce Prince a touiour bié profité, vous m'avez en troisieme lieu demandé par voz lettres, qu'est ce q' ie pèse de son depart de la court lors que ceste dernière reünion de noz François auoit esté iarôpué, & si voulez sçauoir leq'l des deuz vous deuez croire. Ou qu'il soit parti non seulement avec la bõne volõté du Roy & de la roine sa mere, ains ayant faict promesse de rõpre & diffoudre cest orage, & pour le dire en vn mot, de trõper & trahir ceus du parti duquel il se mettoit, & dõt il prenoit la protectiõ. Ou bié q'forcé vrayement de plusieurs mescõtentemens il aye eu intelligece avec ceus de la religiõ, & aye esté
cause

cause de la prise des armes , ou pour le moins de la venue des Reitres en France . De l'un desquelz points ses malueuillans se veulent seruir pour le rendre maluoulu de tous les Catholiques : & de l'autre pour nuire à la reputation de sa foy , voire oster la creance que toutes sortes de personnes, tant estrangers que François, pourroient auoir en luy . Ce qui est vn vray tour d'ennemy , mais qui pourtant sembleroit grossier , si nous n'estiõs tombez en vn tans auquel les hommes võt imaginant ce qui est plus estrange, encor qu'il ne soit aulcunemēt vray semblable pour auoir veu auenir ce qu'ilz croyoint le moins , & à quoy ilz n'eussent jamais pensé . Toutefois il y a moyen de tirer les esprits & iugement des hommes , d'une telle confusion qui faict, que les vns ou les autres se trompent, & peut estre tous ensemble . En considerant le present & l'auenir par le passé : puis les effectz bons ou mauuais, non selõ qu'ilz nous apparoissēt de prime arriuee , ains selõ la portee, naturel, & inclination de ceux qui en sont comme les instrumēs & moyens, & à qui on les attribue . Et en dernier lieu, laquelle d'entre plusieurs affectiõs & passions, qui peuuent auoir esté le motif

D & cau-

& cause de ce que nous coniecturons, a peu estre par raison la maistresse & auoir eu plus de force. Car certainemēt si nous suiuous cest ordre nous ne sçaurions de gueres nous tromper, non seulement à rechercher les actiōs de Monsieur qui est vn ieune Prince, & par consequent aisē à reconnoitre quel il est, & a esté en ce qu'il a fait cy deuant : ains aussi pour sçauoir le fons & secret des deportemens des plus fins & couuerts que lon sache. Or voicy comme ie rapporte ce que ie dy à ce que vous me demandez. Apres m'estre, pour en juger plus sainement, représenté toutes les cōiectures & raisons que i'ay ouy proposer sur ce discours, i'ay rappelé d'vn autre costé à ma souueraince, ce que i'auoy veu pendāt tout le tans dont i'ay parlé. Ainsi ayant encor aus yeus le seiour du bois de Vincenes, les veilles & estroittes gardes, la vie que lors ce Prince y menoit, comme chacun craignoit de parler à luy, voire le fuyoit, les feueres recherches qui lors furent faictes contre luy, bref ce qui fust executé en la personne de ses plus grans, plus signallez, & mieux aymez serui-
 reurs; Il m'a semblé que c'est se iouer, de dire que rien s'y fust passé avecq dissimulation & feintise,
 com-

cōme aussi il n'en y auoit aucune occasiō ou sujet, ains que c'estoit vne pure & ialouse indignation du feu Roy accreüe par plusieurs mauuais moyens & calomnies, nō sans crainte de pis pour l'auenir, si son regne eut duré plus longuemēt, ou s'il ne se fust radouci. Tellemēt qu'esmeu de l'obiet de ces choses & des autres qui sont auenuës depuis, ie suis demeuré resolu que la suite de tels soupçons & deffiances, auoit esté toute semblable à sa source, depuis l'auenemēt du Roy à la couronne, & qu'en effect le mutuel sentimēt & opinion de bōne affection qui deuoit estre entre les freres, estoit deslors beaucoup alteré & quasi estaint. Et qu'à ceste cause c'estoit chose bien naturelle & presque ineuitable, que de voir biē tost apres reüssir le tout à vne desunion toute ouuerte: veu mesmes que ceux qui le desiroint, ne cessoient de donner hardiesse à l'insolēce de quelques fauoris, pour dire & faire ce qui estoit, non seulement desagreable à Monsieur, ains quasi outrageux. Si que ie ne sçauroy dire, lequel des deux estoit plus estrange, ou qu'il peut supporter tant d'indignitez que lon luy faisoit, ou qu'il y eut de personnes assez hardies pour en estre les auteurs,

& comme les instrumens sans crainte de l'aue-
 Encor moins sçay ie lequel des deux luy deuoit
 estre le moins supportable, à sçauoir d'édurer tel-
 les offenses en les dissimulât, ou de les souffrir en
 se plaignant: pour ce que tenir sa douleur secre-
 est la renforcer: & de la voir mespriser en la di-
 sant est l'aigrir & la redoubler. Car certainement
 moy mesmes, qui n'auois aucune particuliere ob-
 ligation à ce Prince, ne pouuois qu'à peine me
 commander, lors que ie voyoy le Ga, le plus or-
 geuilleuz homme qui fust iamais, passer & repas-
 ser assez souuent deuant luy, sans le saluer ou faire
 semblant de le voir: Ains comme vn paon regar-
 der à sa queue & longue fuite de capitaines & sol-
 dats qui le suiuiuent ordinairement. Mais sur tout
 ie fu touché de despit lors qu'un iour assez matin,
 ie rencontray vn gentilhomme, qui auoit accou-
 stumé de coucher à la garderobe de Monsieur en-
 trât au Louure, avecq vne contenâce si courrou-
 cee, qu'elle m'occasionna de luy en demander la
 cause, lors qu'il me deit que cest audacieus dont ie
 vous parle, auoit bien osé le soir auparauant venir
 remarquer, ceux qui estoient en la chambre, & en
 faire sortir maugré Monsieur, ceux qui luy auoient
 scm-

semblé, comme s'il eut eu commandement de le faire ainsi. Ce qui estoit presqu'autant, comme s'il eut faiët desia le Geolier ou Chastelain, au soin de qui touche d'auoir l'oeil sur la compagnie des prisonniers, de peur quilz ne puissent attenter quelque chose pour se mettre en liberté. Et si me souuient qu'apres son despart ses officiers par la permission du Roy, l'allans trouuer avecq ses mulets & coffres, & estans encor assez pres du Louure, ilz rencōtrérēt le Ga qui reniant & proferāt, tout haut & clair plusieurs parolles outrageuses cōtre Mōsieur, les voulut arrester & peu s'ē fallut qu'il ne le fait. Ce que ie di pour mōtrer que sans doute ce q̄ les fous cōmettoint & disoient ouuertemēt, estoit vn grād indice de ce que les plus mōderez, cachoint & avec compassion preuoyoint pouuoir auenir à la personne d'un si grand Prince. Car il sembloit que l'on s'y acheminast peu à peu, ayant commēcé à le demettre du renc qu'il deuoit tenir, & raualer tous les iours sa reputatiō, credit & dignité. Et de fait siz mois auant son despart, on tenoit par toute la France pour chose du tout arrestee, que le Duc de Lorraine seroit faiët Lieutenant general: & encor qu'on l'estime Prin-

ce si sage, que de n'en auoir onc ouuert la bouche & ne s'auoir voulu ; Toutefois on faict doute s'il se fust point en fin laissé aller à faire, ce qui eut esté attaquer ouuertement la seconde personne de France, & eut peu estre vn iour sa ruine & celle de tous les siens. Tellement que comme le Lacedemonien Lisander se voyant sans raison attaqué en toutes choses par le Roy Agesilaus, pour quelque ialouse indignation qu'il auoit conceüe, luy deit: Vrayment Agesilaus tu sçais bien humilier tes amis. Ainsi Mōsieur pouuoit dire au Roy, qu'en cor mieus sçauoit il abbaïsser les siens. Mais que pour l'amour de toute la France, & des estrangers qui ont les yeus sur ce qui se passe à la Court, il deuoit plustost se seruir de luy, que en le faisant mespriser le rendre inutile au biē de ses affaires & du Royaume. Et voyla quāt à ce qui s'estoit passé.

Quant à la passion qui seruoit lors d'esperō & à l'intention du despart, i'ay pensé longuement à part moy quelle apparence il y auoit de dire, que le Roy ou la Roine se fussent lors voulu seruir de la personne & entremise de Mōsieur, pour ruiner leurs ennemis : mais en fin i'ay trouué ceste pensée du tout ridicule. Car se faire croire, que

le Roy qui nes'estoit encor bien fié de son frere, soit qu'il l'aye faict de son mouuement, ou par simpression d'autrui, eut voulu consentir à luy mettre en main vne grande armee composee d'hommes du tout partisans, pleine d'aigreur & ambitieuses persuasions, me semble estre plus hors de propos, que de dire qu'il luy eut permis de tenir touiour pres de soi, vne centaine de ceus qu'il aime le moins, pour le conseiller & luy assister en toutes choses Et que si cela n'est croyable, encor l'est moins d'estimer, que la Roine sa mere luy eut voulu faire iouer vn tel personnage que l'on dit, sans respect du danger de sa personne, ny du blame de sa reputation. Estant au reste du tout hors d'apparence, ores qu'il ny eut que ce seul point considerable, de s'imaginer que le Roy ou la Royne sa mere fussent lors reduits à telle extremité, & fussent venus à tel mespris d'eus mesmes & de leur sang, que de vouloir employer Monsieur à estre traistre. D'autre costé quand i'ay pris garde à son naturel, ie trouue encor vne telle imagination plus estrange, ne voyant en aucune de ses actiōs quelque signe ou apparéce, ou de faute de cœur, ou de desloyauté, qui sont deuz qualitez,

D iiii qu'il

qu'il faudroit s'estre rencontrées ensemble pour
 l'auoir fait consentir, à vn acte & pensée si lasche
 & pusillanime. Mais dittes vous, les effects nous
 ont occasionné d'en croire quelque chose. Quād
 i'oys vn tel langage & le discours de ces effects pre
 tendus dont nous parlerons maintenant, il me
 prend enuie de louer ceus qui ont dit, que la Dia
 lectique & façon de raisonner, est vn art & qu'o
 res qu'il consiste en jugement, il a besoin, toute
 fois non seulement d'vn bon naturel, ains encor
 d'vn maistre. Car pour ietter de premier coup le
 coignée au pied de l'arbre, & m'attacher au plus
 grandes apparences qui en cest affaire semblent
 auoir donné dans la veüe des hommes, ie deman
 deroy volontiers comme il se soit peu faire, que
 tant de personnes ayent façonné vn si mauuais
 argument, que de dire: Monsieur s'estoit ioint a
 vecq ceus de la Religion, il s'est despuis retiré en
 ses terres & est venu à la Court, il faut donc croi
 re, qu'il en estoit parti avecq intentiō de leur nui
 re & de les ruiner. Si en ceste façon d'arguer il y
 auoit quelque subtilité, i'excuseroy ceus qui ne
 l'auroint peu dissoudre: Mais vous voyez que la
 consequence & conclusion n'en vaut rien, pour
 de

de là tomber en vne opinion si defauantageuse contre vn grand & genereuz Prince: & qu'au contraire, il n'y a point d'inconuenient, voire que mesmes il auient souuent, que les grans delaissent le parti qu'ilz auoint porté nagueres, ou feignent de le delaisser, estans assisteuz & esmeuz de plus grandes raisons & plus importâtes pour leur conseruation, que n'estoient les premieres. Aussi vous pouuez iuger par cecy ce qui est assez coustumier à sçauoir, que ceus qui veulent asséurer quelque merueille, & mesmes es affaires d'estat, fuyent la maniere de reserrer ce qu'ilz disent en peu de paroles, pour ce que cela decouure trop soudainement l'absurdité de leur imagination, & pourtant se tournent volôtiers au discours de plusieurs raisons & coniectures recherches sepârement, voire controuuees le plus souuēt, pour aider à se trôper & à deceuoir autrui; Tant c'est chose naturelle à l'homme que de mentir, pourueu qu'il y aye quelque apparence: dont les menteurs ne peuuēt manquer, pour ce que toutes les actions du monde en sont pleines, & mesmes celles qui sont les moins conuës: Tout ainsi que nostre veuë se trôpant en infinies sortes monstre euidentement fa

E foi-

foiblesse aus coleurs, que nous estimons en les regardant à la lueur de la chandelle autres, qu'elles ne sont à la lumiere du iour. Et auient ce qui est le pis que ceste ignorance est causée, que les desfiás & soupçonneuz ne sont pas seulement louez comme sages, ains tenus assez longuement pour veritables, iusques à ce que quelques notables euene- mens induisent à penser le contraire, & conuein- quent la mensonge. Ce que ie vei dernièrement par effect en l'endroit de plusieurs, qui ayans sou- stenu ostinément ceste intelligence de Monsieur avec la Royne, à son premier despart me confessè- rent entendās les particularitez des derniers mes- contentemens, qu'ilz auoint tort de l'auoir ainsi creu. Combien qu'à mon iugement, il n'estoit besoin de voir ce qui est auenu pour s'en éclair- cir, si la chose eut esté conceuë par des hommes qui n'eussent esté preuenus, ou d'une faulse persua- sion, ou de mauuaise voloté. Et me souuient, que quand on me proposa ces soupçonneuz doütes du retour de Monsieur en la Court, contre ce qu'infinites personnes s'attendoient de voir, ie n'en demeuray pourtant gueres plus estonné ni plus en doute, que ie le suis maintenant; Ains leur dy
que

que pour plusieurs raisons i'auoy pensé que cela pouuoit bié auenir . Car d'un costé ie scauoy que deuant la paix & estant le camp en Auvergne, il auent des differens souz diuerses occasions, entre ceus qui estoient autour de Monsieur, non seulement pour les charges & honneurs en l'armée, ains pour le conseil & gouuernement des choses de la guerre & negociation de la paix : Les vns voulans qu'on n'espargnast rien, & que l'on veint iusques aus portes de Paris, se persuadans par ce moyen d'induire le Roy à accorder de plus auantageuses conditions : Et les autres estés d'opinion d'espargner le peuple & le Royaume le plus qu'il seroit possible. Car ceus cy s'approchans d'auantage du naturel debonaire de Monsieur, qui d'ailleurs vouloit faire conoitre au Roy son frere, qu'il ne desiroit rien tant que se despartir des armes & rauoir sa bonne grace. Et estans aussi secondez de l'autorité du Sieur Marechal de Montmorency, que l'on y auoit enuoyé à ces fins, ilz emporterent aiseement le dessus en telle cōtention : Mais aussi ilz meirent tous les autres en la desfiance, qui a esté la source dont a coulé le reste des faus bruits : Et laquelle estoit sans doubte pour estre tresperni-

cieuse à tout le parti, si la guerre n'eut pris biẽ tost fin. Considerat ces choses, & mesmes que le Roy de Nauarre nouuellemẽt parti de la Cour, & qui par les mauuais moyens de quelques hommes malitieux, auoit esté quelque tans auparauant desuni d'avec Monsieur, tireroit facilement de son costé, tous ceus qui restoint malcontents, pour les raisons que i'ay dittes : il me sembloit ici voir ce Prince offensé des desfiances qu'on auoit de luy, & mal accompagné de ceus dont il auoit pris la protection, prester l'oreille aus messages & prieres de la Royne sa mere, & en somme estreia de retour à la Cour. Je scauoy d'ailleurs que desemparé de ceus qui l'eussent principalemẽt destourné de ceste volonté, il n'y auoit plus partie assez forte, pour empescher qu'il ne le feit, & ne suiueit le cõseil, asseurãce, & persuation de celle, qui n'employoit pas seulement le credit de l'auoir quasi entre ses bras nourri & esleué dez le berceau, ains encor y apportoit la presence, les yeus, les parolles, & en somme le nom & autorité d'une mere.

Voila pourquoy ie pense que comme Alexandre ayant receu plusieurs accusations de la part d'Antipater contre Olympias, deit lors : qu'Antipater

ne ſçauoit pas qu'une ſeule larme de mere eſſa-
 goit diz mille telles lettres : Auſſi Monſieur pou-
 uoit à bon droit reſpondre à ceus qui remettoint
 en doute les promeſſes de la Royne, en luy per-
 ſuadât de s'en deſfier, que le moindre de ſes ſous-
 pirs eſtoit ſuffiſant pour appaiſer vn million de
 telles deſfiances. Mais au demeurant entre les rai-
 ſons de ceſte miene preuoyance, ie ne veus ou-
 blier de mettre ce qui ſoudain apres la paix, eſtât
 tramé par ſes plus grans & plus anciens aduerſai-
 res, l'occaſionna de mieus encor penſer à ſoy & à
 ſes moyens, & en ſomme de ſe fortifier d'un au-
 tre party au lieu de celui qui s'eſtoit par deſſan-
 ce retiré de luy. Or c'eſtoit la ligue qui comme
 chacun ſçait fuſt entrepriſe au commencement,
 ſans le conſentement & contre la volonté du
 Roy, mais toutefois par vne telle & ſi fine menée
 que pluſieurs milliers d'hommes de toutes quali-
 tez & conditions l'auoint ia ſouffignée, obligeans
 ſouz preteſte de la Religiō Catholique les ſugers
 du Roy à employer & armes & moyēs pour l'ac-
 compliſſement de ce qui ſeroit auisé par le cōſeil
 & chefs de la ligue, menaçant en outre les contre-
 uenans & refusans du danger de leurs perſonnes,

& de la perte de leurs biens, & declarant ce qui estoit le point principal, tous ceus qui soustien-droit ou porteroit les armes pour le cōtraire parti, indignes & incapables de succeder à la corōne. Ceste ligue donc estant de prime arriuee mespri-fee, puis s'estant ia coulee dans les meilleures pro-uinces, villes & parlements du Royaume, esmeut en fin & le Roy & Monsieur ensemble à y reme-dier. Tellement que le Roy occasionné d'ailleurs du besoin de ses affaires & de la guerre ciuile, à la veille de laquelle il se voyoit, & Monsieur ne se voyant vn meilleur party, ny plus honeste pour se deffendre de ses ennemis, que de se reünir du tout avec son Seigneur & frere; Ilz feirent tous deuz en vn instant ce qui estoit assez malaisé, & changerent l'effect & crainte de ceste dangereu-se menee en leur asseurance & soustien: & en se donnans comme chefs & autheurs d'vne mal sa-ge deuotion populaire, ilz rendirent vaine l'am-bition des particuliers, qui l'auoint forgee pour y dresser quelque iniuste & malicieuse grandeur & autorité. Ainsi pour auoir esté bien aduertí de toutes ces choses, ie n'ay sceu lors ny maintenant trouuer occasion du blame qu'on a voulu don-
ner

ner à ce Prince, d'auoir quitté ceus de son party, veu qu'il me semble qu'il fust pluſtoſt delaiſſé & comme reietté par eux, au cœur de qui la deſfiance s'eſtoit ia deuant logee, par le rencontre, non tant des occaſiōs que i'ay dittes, que des humeurs de ce tans. Je n'ay peu auſſi attribuer à inconſtance, ce qu'il fust bien toſt apres la paix de retour à la Cour en eſtant ſemons, avec tant de ſi ſolennelles, & ſaintes promeſſes & ſermés. Ni n'eſtime molleſſe d'auoir cedé aus prieres de la Royne ſa mere, leſquelles n'eſtoint pas ſeulement fortifiees de pluſieurs & grans reſpects, ains auſſi de l'induction de la plus part de ſes principaux ſeruiteurs: tellement qu'ores qu'il eut faiât en ceſt endroit vne tresgrande & apparente faute, ſi ſeroit il excuſable de l'auoir commiſe, lors que pour l'eſtat de ſes affaires il ne l'auoit peu preſque euirer. Mais ſi on vient à reconoitre & remarquer en telle reſolution, ceſte meſme fermeté de courage affrâchi de tout remors de conſcience, qui auparauant à la mort du feu Roy Charles le ſeit ſi longuement patienter, & luy oſta l'apprehenſiō de toute crainte, ſans doute ou aura beaucoup plus à le louer qu'à l'excuser. Car auſſi vne telle péeſe ne fuſt en-

tree ny en quelque foible & mol esprit, ny en ce-
 luy qui se fust senti coupable de quelque mali-
 cieufe & desloyale entreprise . Ce qui estoit assez
 iustificié par le mescontentemēt des autres, qui au-
 roit pris occasiō de se desfier de luy, pour ce qu'il
 auoit serui comme de mors à retenir l'insolence
 de la guerre ciuile, & auroit en somme empesché
 que les choses fussent mises en vn point, non seu-
 lement plus dangereux, ains plus dommageable
 & deplorable pour tout le Royaume . En quoy
 si la passion ne veut estre la maistresse, & ne veut
 tout emporter d'autorité, on cōfessera qu'il n'en
 pouuoit vser autrement, soit qu'on le considere
 comme François, ou que cōme le premier Prin-
 ce de France, on le iuge auoir esté obligé à deli-
 urer auplustost le peuple d'un si pesant fardeau,
 & à euitier la perte de tant de noblesse & soldats
 qui fussent demeurez à la premiere bataille, &
 dont il sembloit que l'on fust à la veille. Tout ain-
 si que l'on peut dire que c'estoit bien le deuoir
 des estrangers de nous souhaitter vn si grād mal-
 heur, que de mettre les choses en toute hasardeu-
 se extremité & outrance, mais non de ceus que la
 nature & toutes les plus anciennes lois des hom-
 mes

mes, exortent à s'espargner, conseruer & maintenir. Or ie croy que tous ceus qui iugent combien est desraisonnable & felonnie, la volonté des hommes outrez d'aigreur & desir de vengeance, encor sentiront ilz ausli facilement, de combien mauuaise source sont naiz les propos, qui ont rempli les oreilles & esprits des hommes de tât de mauuaises impressions, & particulièrement combien est mal fondee ceste prudence & conseil, qui lors que Monsieur estoit à Bourges, induiseit Mōsieur le Prince de Condé, à tourner tout court vers la Rochelle, au lieu de le venir trouuer, cōme ayant esté aduertit de quelque dāgereuse partie qui luy auoit esté dressee. Car c'est tousiour la cheute de tels soupçons que i'ay remarquez, que de tomber en l'imagination de quelque acte tragique soit à droit ou à tort, cōme voulans ceus qui craignent, plustost que d'estre estimez vmbrageuz, cōtraindre la mensonge de prendre quelque couleur & apparence de verité. Et certainement ceus qui feirent faire vne telle demonstration de desfiance, si preiudiciable à l'honneur de Monsieur, ont monsté auoir esté bien malades, ou n'auoir gueres aymé leur maistre. Car quelle apparence y auoit

il de craindre vn si lasche tour, de celuy qu'on a
 touiour conu tel que ie l'ay descrit cy deuant,
 après auoir esté comme compagnons d'armes,
 & sans qu'il fust entreuenue aucune occasion de
 haine ou mescontentemēt, & lors que Monsieur
 ne s'estoit encor aucunement resolu de retourner
 à la Cour, & n'auoit encor bien faict sa paiz avec
 le Roy sō frere: Certainemēt la crainte & le soup
 çon n'ont aucunes bornes, ne certitude, aussi sont
 elles bien differentes de la prudence qui voit tou
 iour clair, & ne se laisse conduire par vne aueu
 glee & fausse imagination. Tellement que ie con
 clus que ces Messieurs qui donnerent vn tel ad
 vertissemēt à ce Prince, luy feirēt, & à tout le par
 ti de ceus de la Religion, vn tresmauuais seruice.
 Car ores que pour tout cela Monsieur n'aye peu
 estre destourné de la bonne volonté qu'il auoit
 tousiour eue de leur procurer vne paiz, ce qu'il a
 faict despuis à leur grand besoin: toutefois il est
 certain qu'ilz furent cause de luy faire rompre du
 tout l'intelligēce qu'il auoit gardee avec eux pour
 leur bien & repos, affoiblissans d'autāt leur parti,
 & accroissans le cœur à leurs ennemis. Or ie pen
 se vous auoir satisfait pour le regard de vostre
 troi-

troisieme question , & que vous n'avez meshuy
 autre opinion , sinon qu'en ce premier despart il
 n'y eut rien de fainct, tout ainsi que les offences &
 mescontentemens n'estoint que trop grands &
 trop vrais:& pourtāt que vous voyez que la guer-
 re estant ia toute nee en ce tans là, & les armes ia
 toutes dressees & dedās & à la frontiere du Roy-
 aume , le chemin fust comme trassé à Mōsieur la
 part ou il auoit à se retirer pour son assurance:
 Son nom & autorité ne pouuant estre que tres
 souhaitable à ceus de la Religion , comme aussi
 leurs forces luy venoit bien à point pour faire ce
 chef d'œuvre que plus il desiroit , assauoir d'esta-
 blir pour iamais la paiz en ce royaume: Que si
 les choses n'ont despuis succedé ainsi que l'on
 esperoit, ains semblent estre reüssies tout au con-
 traire, on en doit accuser principalement la diui-
 sion de noz volonteiz, qui estableit tous les iours
 presque de nouueaus partis , & quasi autant de
 chefs que de testes , avec le malheur de nostre
 France, qui par la longueur de noz ciuiles dissen-
 sions, a esté remplie de haines & soupçons presque
 irreconciliables & de trespernicieuses menées, par
 lesquelles tous les bōs deslains de la paiz , ont esté

tousiour peruertis, & toute la maison Royale tel-
 lement desunie & quasi desmembree, qu'elle en
 est auiourd'huy non seulement moins redoutee,
 ains quasi mesprisee de noz ennemis & voisins.
 Ie vien maintenant à vostre quatriesme doute &
 à ce que vous me demandez comment il aueint
 que Monsieur fust si fort changé, que d'estre de-
 uenu ennemi de ceus de la Religion, & qu'en ou-
 tre il fust present & aye peu voir les cruautez, qui
 se commeirent contre les habitans des villes qu'il
 assiegea & força, & contre ceus qui s'y estoient re-
 tirez au commencement de la guerre. Ce qui a
 deuz considerations dont ie vous ay deja touché,
 l'une qui regarde tant le peu d'estat qu'il pouuoit
 faire de ceus qui ne montroit auoir gueres de cō-
 fiance en luy, comme les autres occasions de son
 retour. Vous pouuant bien au reste adiouster ce
 mot qui est, que ceus qui n'ōt voulu ou tenu con-
 te d'obliger son amitié, que par des liens de des-
 fiance & soupçon manifeste, ont fort mauuaise
 occasion de se plaindre de ce qu'il a faict. Estant
 bien certain qu'un autre Prince de plus aigre na-
 turel que luy s'en fust voulu bien resenter autr-
 ment. Mais qu'au demeurant ores qu'il ny eut
 rien

rien de tout cela, & qu'il eut eu beaucoup plus d'argument à prendre leur protection : si est ce que sa venue en Cour, estoit comme vne façon d'engagemēt de sa volonté, pour ne pouuoir rien plus faire es choses de la guerre & de la pais, sinō ce que plairroit au Roy son frere. Et ores qu'il fust venu à s'en repentir, si n'ignoroit il pas qu'il n'estoit plus en son entier de rechanger sa cōdition, & qu'il luy eut fallu endurer avec quelque preste pis qu'il n'auoit souffert, si tant soit peu il eut montré n'approuuer pas, ce qui estoit vne fois conclu & arresté, & qu'en somme d'auoir esté faict Lieutenant general de sa Majesté, ne luy estoit pas tant vn hōneur comme vne necessité d'executer tout ce qui luy seroit commandé.

Si donc sa venue auoit esté quasi forcee d'infinis bons respects, honestes & necessaires pour sa conseruation, le reste de ce qu'il a faict depuis y est comme attaché, & doit estre iugé non comme action volontaire, ains comme la suite de ce qui nous tient obligez d'une chose & violēte & premiere. Quant à l'autre consideration, elle a pour suget les particuliers excez commis souz son nom & auen, comme est le sac d'Issoire. En quoy

ie vous puis dire qu'il seroit à blâmer si à la façon des Romains avec la charge de faire la guerre, il eut receu la puissance de leuer son armee & faire choix de ceus qu'il auoit à y cōmettre souz soy. D'autant que par ce moyen il se seroit obligé à rendre raison du faict de tous. Mais on sçait bien qu'il en alloit tout autrement, & qu'il auoit des troupes composees non seulement de soldats mal creez, ains menées par ceus qui tousiour ont voulu plustost commander qu'obeir, sans regard de la preeminence qui est deuë aus Princes du sang. Tellement qu'il pouuoit confesser sans deshonneur que plus vrayement vne armee l'auoit, que luy n'auoit vne armee. Aussi entre les plus grans regrets qu'il aye euz de s'estre lors veu le plus foible en son camp, celuy a esté des premiers que de voir executer infinies choses contre son gré, par ceus qui ne se plaisoient pas tant à les faire, comme ilz taschoient de charger son honneur & reputation de tout le blame & reproche, & rendre son nom d'autât plus odieuz à tous que plus on y commettoit de choses reprochables. Ce qu'il ne pouuoit bonnemēt euitier : pour ce que la souuenance des choses & aigreurs passées, & l'audace de

de quelques courtisâns, ne luy permettoit encor de gagner assez de creance enuers le Roy son frere pour auoir de mesme l'autorité que le nom de la charge qu'on luy auoit donnée. Ainsi la raison vouloit que ne pouuant pour lors mieus faire, il attendeit que l'on traittast des conditions de la paiz, qui estoit l'vn de ses plus grans desirs pour lors s'y employer & en auancer la conclusion, comme il a touiour faict. Car sans doute ie croy qu'il luy faut dōner ce los, que de s'estre touiours entremeslé des troubles de ce Royaume, poussé d'vne tresbonne enue d'en arrester & faire perdre le cours, & d'auoir commencé d'entrer en vne si belle & sainte contétion d'esprit, beaucoup plustost que l'on n'auoit esperé de son aage. Voulant par ce moyen en ne se resentant de rien qui peut troubler le repos public, estre dit auteur nō de la dissension & vengeance, ains de la paiz & reünion des sugets. Aussi trouue ie qu'en effect il se porta de mesme, iusques à montrer qu'il auoit pitie & compassion des maus, que ceus de la Religion auoint à receuoir, si on eut poussé plus auât la suite des bons succez qui auoint accompagné le Roy iusques à l'heure. Et de fait l'on sçait

la resistance qu'il feist fort à propos, contre ceus qui au partir d'Issoire, luy vouloint faire dōner la charge d'aller assieger Perigeuz, & comme il en reietta l'ētreprise, iusques a ce qu'on eut conduit à chef, ou failli à parfaire la negotiatiō de la paiz. Disant qu'un tel siege seroit cause d'en diuertir du tout les volōtez, qui pour lors y estoient autrement assez bien disposees, en quoy il se monstroir Prince fort auisé. Car comme qu'il fust allē de ce siege, ou bien ou mal, il fust auenu que d'un costē ou d'autre, on se fust degoutté de condescendre aus conditions qui ont toute fois estē accordees, la prosperité leuant le cœur aus vns, & l'aduersité mettant les autres au desespoir. De façon, que tous sont demourez d'accord, qu'il a beaucoup aidē à un si bon ouurage, & que tous les François luy en demeurent infiniment redevables. En cest endroit il m'escherra tout à propos de joindre ce qu'il me semble touchant la negociation de Flandres. Car si bien ie m'en souvien c'est le cinquiesme de voz doutes: lors que vous dittes, que plusieurs se sont esmerueillez, tant de la longue contradiction que le Roy a faict à vne telle entreprise, comme aussi de la volonté con-

tinu-

rinuée contre tant d'empeschemens de la part de Monsieur pour aller prendre la protection de ce peuple, qui apres vn million d'oppressiōs & insolences Espagnolles demande secours de nous, comme estans pour infinies raisons. obligez à le luy donner, plus qu'aucun de leurs autres voisins: sur laquelle contrarieté vous desirez sçauoir qui a le droit ou le tort. De ma part parce que ceste question allongera beaucoup ma lettre, & qu'elle meriteroit vn discours à part, ie l'eusse volontiers passée, mais d'autant qu'elle importe, & que l'ayant acheuée il me semble que ie pourray bien tost apres finir, j'ay mieus aymé vous satisfaire en-
cor en cest endroit que de m'en taire.

Vous sçauiez qu'il y a dix & huit ans, que nous auons commēcé d'estre bons amis de l'Espagnol, establisans vne telle amitie non seulement par l'alliance qui fust lors faicte entre noz Roys, ains encor despuis par vne mutuelle intelligence, & secours lors que le besoin de l'vn ou de l'autre Royaume l'a requis. Mais ie ne sçai si vous auez pris garde que l'vn des plus forts liens qui nous ayent vnīs & entretenus en bon accord, a este la contention qui s'est esmeuë pour la Religion

G tant

tant icy qu'ez pais bas. Pource qu'il est auenu
 que nostre Roy qui se voyoit vne civile dissen-
 sion à tous coups renaissante sur les bras, a pensé
 tousiour hors de propos & saison de rōpre avec
 aucun de ses voisins. Comme aussi l'Espagnol,
 qui se craignoit dez le commencement de ne pou-
 uoir bien iouir à sa volonté de ces pais, qui sont
 comme desmembrez de ses autres Seigneuries, &
 en fin estant entré en crainte de les perdre, n'a osé
 faire son profit de noz differens, sinō en esperan-
 ce que le rans nous ruinerait assez, & que noz di-
 uisions à la longue luy donneroit de quoy s'ac-
 croitre sur nous, sans y despēdre riē du tout. Mais
 au reste ilz ont pendant ce rans pratiqué beau-
 coup plus de finesse que nous, comme aussi nous
 auons l'ame plus franche. Et se sont aydez de deuz
 moyens pour nous empescher de leur pouuoir
 nuire, & ne perdre iamais pourtant de veuē le but
 de leurs esperāces & mauuaise intētion. L'vñ a esté
 d'allumer tousiour dauātage & apporter du bois
 à nostre embrasement, se seruant en cela tant du
 Pape & de noz Ecclesiastiques, que de l'ostinatiō
 & mauuaise volonté des plus ambitieus & re-
 muans qui soient entre nous. L'autre a esté pris de
 ses

les coffres & de son or Peroufin; par le moyen duquel il s'est faict infinis bons seruiteurs; qui non seulement ont grand credit ez meilleures villes & parlements de ce royaume; ains mesmes ont seari ce au priué conseil de nostre Roy; & entret pres que tous les iours en son cabinet. Car c'est par euz qu'il a esté tousiour auerti de tous noz affaires; & par le moyen desquelz, il a rompu toutes les plus grâdes parties que son auoit dressées par-deça contre luy. D'autant que ceus là ont bien & le credit & la force, de destourner ailleurs l'enuie que le Roy pourroit auoir iustement de recourir ce qui luy appartient, & l'ont induit à se vouloir venger plustost de l'Anglois que de l'Espagnol. Combié que les plus sages & plus affectueux à son aise & au bien public; luy voulussent faire croire au contraire, que sur les yns il pourroit beaucoup s'accroître; & que contre les autres il perdrait en gagnant. Ainsi vous voyez comme noz Roys empêchez de leurs troubles; & en pais se trouuans laissez voir espussez de forces par des guerres domestiques; & au bout de tout persuadez par leurs conseillers mesmes; ont reiecté & l'esperance & le vouloir de mal faire à l'Espagnol,

& que c'est la raison pourquoy ilz n'ont peu nō plus trouuer bon qu'aucun des leurs en feit autre mēt. Ce qui a esté encor couuert de plusieurs belles raisons. Car les vns disoient qu'il ne falloit permettre que l'ambitiō des particuliers iettast ainsi le Roy en guerre avec ses plus grans, & plus puissans amis & voisins; sans qu'il en eut à recevoir aucun profit. ains seulement le dommage, veu que l'accroissement seroit pour vn autre, & qu'il n'y auroit que luy qui sentiroit la perte de ses sugets lors que l'entreprise reüsseroit mal. Aufquelz on pouuoit bien respondre, que la France estant après vne guerre ciuile, chargée d'infinis soldats qui ne pouuoient si tost faire vn autre mestier, c'estoit vn grand bien pour le Roy, & vne prudence ia deuant pratiquée par les anciē Rois que de les employer en quelque faction estrangere, & en deliurer son païs. Que si on prend les commoditez & honneur qui prouiet d'une telle entreprise, il y auoit encor moins de raison de la vouloir rompre. Car si iadis les Romains n'estimerēt aucune de leurs victoires si honorable, cōme d'auoir peu remettre sus la liberté de la Grece, & en chasser les tyrans; Et si en effect l'industrie

strie des peuples du pais bas avec l'aueu de tous ne s'approche pas peu du merite des anciés grecs, sans doute il deuroit sembler avec bonne raison que noz Roys ne pouuoient entreprendre rien de si louable q̄ de les secourir, veu que nō par legere-té ilz tendent la main à vn nouueau maistre, ains implorent l'assistance de tous les princes, pour estre sauuez d'oppression & maintenus en leurs anciens priuileges & franchises. Or il y a plus, car en cecy ne se rencontre pas seulement ce qui est honeste & recommandable enuers tous, ains en- cor ce qui est principalement vtile à nostre Fran- ce, sans parler de la grandeur de noz Roys, qui ayans gaignee la deuotion de ces pais là, n'auroint aucunement à craindre tout le reste de l'Europe ensemble. Ce que ceus m'accorderont qui ont veu combien toute ceste marche est peuplee, d'hommes actifs & industrieuz, de villes tresbel- les, grâdes & fortes, & qui ont remarqué le nom- bre des ports, & haures remplis en tout tans de vaisseaus que le traffic de l'estranger y emmeine, & en somme les commoditez & aisance pour le commerce & intelligence de toute l'Europe si grande, qu'il semble ce pais y estre adonné de soy,

& comme destiné pour rendre tresgrand & puissant celuy, qui en estant Seigneur le rendroit iuste & dous en ses commandemens. Si cela est vray en general, encor est il plus certain pour le regard de nous, qui auons esté de tout ians compris & vnis avec euz souz vn mesme nom, & auons aussi presque touiours suiui vne mesme domination. Tellement que ni les gueres, ni la diuision des pais separez, non de riuieres & montagnes, ains par partages & successions, n'a peu oster la communication & societé des mœurs, & du langage qui dure encor auiourd'huy entre euz & nous. Or nonobstant tout cecy, lors que Monsieur a tant soit peu montré semblant de vouloir entendre à donner vn tel & si iuste secours, il y a eu encor vne autre sorte de gens plus malitiduz que les premiers, qui feignās estre bōs seruiteurs de sa Majesté, ont soustenu que quoy qu'il en aueint, les armes & grādeur de son frere luy deuoint estre suspecte & redourable. Ce qui ne pouuoit toutefois, & ne deuoit à mon aduis, auoir aucune force de persuasion. Veu qu'au contraire prenant les choses & au pis & au mieus de ce que lon en pense, c'a esté vn moyen prattiqué par les Princes les plus

plus desfians que de prouoquer, & comme l'on dit embarquer ceus dont ilz se craignent, en quelque affaire grand difficile & penible, & dont il n'est pas aisé de se desmeller, cōme seroit cestuy cy. S'asseurans qu'ores que toutes choses leur succedent à souhait, si est ce vn point attaché à tout nouuel accroissement, que d'y estre longuement assailli & si mal assuré, q̄ celuy là ne peut gueres rien entreprendre, & ne peut pēter, sinō à se maintenir, & principalement s'il n'est vn grand Roy & monarque. Car aussi l'on voit assez que celuy qui pousseroit Monsieur à entreprendre vne telle conqueste, sembleroit à bō droit vouloir desfaïr le Roy de tout soupçon, plustoist que de luy en donner de nouueaus, ou accroistre les premiers. Mais nous n'en sommes à ce point, car encor en son intentiō il n'y a rien de si redoutable, comme est le nom d'un conquerant, ce que ses preparatifs montrent assez. Ains est en somme vn desir d'acquiescer l'honneur & bienueuillāce de ces peuples, en se rendant leur protecteur & se montrant leur amy au besoin, tout ainsi que le feu roy Henry entreprint la deffense de l'Allemagne contre l'Empereur Charles, & voulut prendre vn pareil

nom, & s'il m'est permis de profetiser, ie croy que les effects en seront tous pareils. Car comme le voyage du Roy son pere rendit la paiz aus Allemans, i'estime aussi que cestuy sien acheminement pourra rendre l'Espagnol plus equitable, ou le contraindre en fin à laisser meshuy ces pources gens en repos. Ce que ie desire de tout mō cœur. Mais il ya encor vne autre façon de gens, outre les deuz à qui i'ay respondu, qui comme se fondans en raison alleguēt, que c'est chose insupportable, voire crime que de tirer les forces hors du Royaume, sans le vouloir du Prince, & ne veulēt auouer que Mōsieur puisse ou doieue rien du tout entreprendre en telle occasion, sans le consentement du Roy son frere : & est ce point celuy, sur lequel est fondé le dernier de voz doutes precedens : doute certainement qui n'est pas petit proposé nuement, & a des oreilles deia preuenues de l'vne des deuz opinions. Mais de moy, ie pense que la premiere chose qui faict à considerer en cecy, est la personne des filz de France, quel reng ils ont tenu & tiennent encor, & si estans assuiettis souz la souueraineté du Roy leur frere, ils sont de la mesme condition que les autres sugets. Car
par

par ce moyen venās à trouuer la difference qu'il y a, & remarquans iusques ou elle s'estēd, on euitera la dispute du deuoir du suget enuers son Prince, qui en ce cas seroit vaine. Il est certain, que les filz de France furent au commencement Roys & Seigneurs souuerains de ce qui leur estoit escheu en partage, tellemēt qu'on trouue en mesme tans, y auoir eu vn Roy de Paris, d'Orleans, de Soissons & d'Austrasie: Et si telle diuision de la Royauté ne se trouua pas seulemēt en la succession de la premiere race, ains encor en la personne des successeurs de Charlemagne, dont les vns furent Roys de Frāce, les autres Empereurs, & les autres Seigneurs de l'Italie. Despuis comme il auient que tous Royaumes reçoiiēt peu à peu des alterations & prennent comme des lois nouuelles, il fust trouué tres salutaire cōme de fait il l'est, pour la conseruation de ce Royaume, que d'attacher aus aînez la succession entiere du sceptre & de la couronne, sauf seulement le droit d'appanage aus autres freres. Estant auisé qu'il faloit ainsi le faire pour n'affoiblir la Monarchie, qui seroit & forte & florissante tant qu'elle demeureroit vnīe, en la diuisant par plusieurs parcelles, & aussi pour oster

H l'occa-

l'occasion des querelles ordinaires, qui naissent
 entre les freres pour leurs droits & confins. Mais
 la question a esté, quel est ce droit d'apanage, &
 quel il a esté: Sur quoy quelques vns pour grati-
 fier à noz Roys & les flatter, veulent renclorre la
 chose en si petit lieu & estroit, qu'il est bien mal-
 aisé qu'un filz de France s'en contente. Et en ce
 faisant, ilz me semblent n'estre aucunement à lo-
 uer, pource qu'au lieu de faire quelque bon ser-
 uice à leur Prince, ilz luy bastissent au contraire
 en luy donnant de telles opinions, le suget d'un
 different domestique, qui apres avec la moindre
 occasion deuient guerre ciuile. Et portant i'esti-
 me que cōme les Historiens racontēt, qu'il y eut
 un Roy de Lacedemone, lequel se voyant repro-
 ché par sa femme, d'auoir aneanti & diminué la
 splendeur de ses predecesseurs en establisant le
 Magistrat qu'on nommoit Ephores, respondeit
 de n'auoir affoibli la Royauté ains de l'auoir ren-
 forcee, en la rendant plus supportable & plus du-
 rable: De mesme aussi on peut dire qu'il vaudroit
 bien mieus à un Roy, de retrancher volontaie-
 ment de ses commoditez plustost que desniant
 quelque chose raisonnable, estre querellé par les
 siens,

siens, ou se mettre en danger d'estre forcé. Ainsi pour retourner du tout à nostre propos, ceus la se montrent plus equitables qui auouent, que les appannages ont esté diuersement ottroyez, ores avec beaucoup de marques de souueraineté, cōme sont les priuileges de faire battre mōnoye, & donner graces, & ores avec beaucoup moins d'auantages selon la faison, induction, puissance & inclination de noz Roys. Je ne veus particulariser de cecy aucuns exemples, pour ce que l'on sçait assez combien il y a de Seigneuries en France, qui ont esté longuement tenues ainsi, & que nous auons encōr la memoire fresche de l'appannage dōné au premier duc de Bourgoigne, filz du Roy Ian, & que mesmes nous n'auōs oublié les droits de souueraineté que noz Roys ont touiour eu sur la Flandre & Artois. Mais ie veu bien dire, que quelque diminution qui aye esté faicte des preeminences deuës aus filz de France, il leur est touiour resté des marques de Royauté, tant en leur suitte, gardes & seruice ordinaire, comme en leur seance: Car de faict ilz ont gardé de tout sans le renq de la maison de France, par dessus plusieurs autres Princes qui estoient souuerains en leur pais,

comme sont les Roys de Nauarre, de Naples, les Ducs de Sauoye, de Milã, Brétaigne, Bourgoigne & Lorraine, sans y conter les Princes Allemans, qui leur ont cedé de mesme. A cause de quoy, ie ne pense point qu'il fust raison de les apparier en subiection, & vasselage aus autres Seigneurs & Princes du Royaume. Mais que le point, auquel ilz sont obligez comme les autres, est celuy dela deuotion & fidelité, ne pouuans rien entreprendre ni contre l'estat & couronne du Roy leur frere, & ne luy pouuans non plus denier le seruice & assistance que le reste de ses sugets luy doiuent. Ainsi pour m'approcher encor de plus prez de vostre doute, i'ay voulu sçauoir s'il y a eu iadis des Princes & Seigneurs en Frãce, qui ayēt entrepris quelque guerre d'euz mesmes, nonobstant les confederations & traittez de paiz, qui pouuoient estre entre le Roy & les estrangers qu'ilz assailloint. En laquelle recherche i'ay trouuē diuers exēples. Car les histoires nous rendent tesmoignage de ce que les Ducs de Guiene, de Normãdie, de Brétaigne, & de Bourgoigne & d'Albret, les Côtes de Foix & d'Armagnac, ont faict avec leurs forces seulement, & n'y a pas si long temps, à sçauoir

du regne des Roys Charles siziesme, septiesme, & de Louis vnziesme, que les guerres de Naples ont esté continuees par la maison d'Aniou, contre ceus d'Arragon & Castille, combié que les Roys qui lors regnoient en Frâce, eussent paiz avec euz. La raison d'une telle souffrance estoit qu'ilz n'estimoient ni iuste ni raisonnable d'empescher l'aggrandissement de leurs freres ou cousins, estimas au contraire & honorable & profitable d'estendre bien loin leur domination & intelligence par la main & forces des leurs. Veu que c'est le seul & assuré moyen pour tirer beaucoup d'amis de plusieurs pais ennemis. Et veu d'ailleurs que le Prince ne peut estre accusé de contreuenir aus traittez qu'il aura faits avec vn autre, pour souffrir & dissimuler à ce qu'il ne peut empescher sans embrouiller son estat, & faudroit qu'il y eut eu nommément ligue faicte entre euz, par laquelle ilz se fussent obligez mutuellement à la deffence de leurs estats, & à courir sus aus ennemis, de l'un ou de l'autre. Ce qui ne fust jamais entre nous & les Espagnols, comme l'intelligence que nous auons despuis cent ans, avec le grand Seigneur le montre. Il s'ensuit donc, ces choses.

estant bien pesces & considerees , que Monsieur
 comme filz & frere du Roy, peut de soy sans of-
 fenser le respect qu'il doit rendre à celuy qui re-
 gne, entreprendre vne guerre, & se rēdre chef du
 parti, pourueu que ce ne soit ni contre sa person-
 ne, ni contre son estat, à la deffense & seruice du-
 quel il est obligé, tout ainsi que les autres Sei-
 gneurs du Royaume. Mais sans doute, nous som-
 mes en termes beaucoup plus fauorables, & tels
 que seuls ilz peuvent iustifier la volonté, que ce
 Prince a apportee en cest endroit. Car c'est cho-
 se assez conue de tous, que cecy n'a point esté
 vne soudaine pointe de ieunesse, ou imagination
 ambitieuse & violente temerité, qui le porte au-
 iourd'huy au milieu de quelque iniuste, malaisée
 & hasardeuse entreprise. Et que ce n'est point vn
 desir de faire son profit des calamitez de ses voi-
 sins, ou de pescher en eau trouble. Ains qu'à la
 verité c'est vne longue & meure delibération pri-
 se sur vne execution treslouable, vn sentiment &
 compassion genereuse d'un peuple rudoyé &
 maltraitté contre ses priuileges & franchises. Et
 vne douce animosité de deliurer d'une miserable
 seruitude plusieurs prouinces, qui ont esté des
 plus

plus florissantes de l'Europe, y venant ce qui est le principal & plus recommandable, non de son seul mouuement ou contre leur volonté, ains semons appelé, & comme inuoqué de tous les estats du pais, pour les secourir à vn tel besoin, & prendre leur protectiō. Voire apres de si grandes & si notables offres, qu'elles estoient suffisantes pour esmouuoir les moins ambitieus. Ainsi pour le regard des estrangers, ie ne pense pas qu'il y en ait vn qui puisse accuser d'ambition celuy, à qui ia despuis trois ans comme tout le monde sçait, on a voulu mettre en main, pour luy estre gage & arres de leur bonne volonté & confiāce, nō vne, ains deuz & trois grandes & fortes prouinces, pleines de grand commerce, de villes munies, de haures, ports, hommes, armes & vaisseaus, & lequel on ne peut dire auoir voulu faire prattiquer, ni les grans par presens, ni les seditieus par promesses, ou estonner les craintifs par surprises, ny en somme s'estre engagé en aucune maniere. Puis qu'à la veuë & au sçeu de tous, il leur a faict ses offres & s'est en fin ebranlé. Et quant à noz François, ie ne sçay qui sont les iuges si seueres & peu fauorables, qui ne louent infinimēt la modestie & hum

ble maniere, dont Monsieur a depuis trois ans
 vſé enuers le Roy son frere, non ſeulement pour
 luy oſter tout ſoupçon & deſfiance de ſoy, ains
 pour auoir ſon conſentement, ſupport & faueur,
 en vne ſi digne & ſi honeſte entrepriſe. Que ſ'il
 eſt auenu, que les ruſes & mauuais moyés, tenus
 par l'Eſpagnol, pour faire de toutes choſes à ſa vo-
 lonté & comme régner en France, ayent eu plus
 de force enuers le Roy, que les honeſtes prieres
 de ſon frere: Ie penſe que l'on doit s'attendre de
 l'en voir quelque iour repentir, pluſtoſt que de
 s'en douloir ou offenſer d'auantage, ayant regret
 de n'auoir eu part en la deliurâce & recouſſe, non
 tant de ce païs là, comme des hommes, leſquelz
 ſe peuuent dire des moins malitieux, & des plus
 induſtrieux & profitables au cōmerce & beſoin
 de la vie qui ſoient en l'Europe. Et combien que ie
 ſçache, que c'eſt vn point preſque ineuitable à
 tous les beaux actes & genereux, que d'eſtre aſſail-
 lis à leur naiſſance de l'enuie & de la meſdiſance,
 & que d'ailleurs pour pluſieurs autres aigreurs &
 maladies de noſtre Cour, on ne ceſſera de ſouffler
 aus oreilles du Roy, pour l'en rendre de plus en
 plus malcontent: Toutefois, ie croy que peu de
 rans

tans donrra vne telle lumiere aus actions, & intention de ce Prince, que toute la mauuaife opinion si point il en reste encor se trouuera, tout à coup estainte au cœur des hōmes, & se changera soudain en louēges & deuotion. Or pour tōber meshuy sur la fin de ma lettre, & venir au dernier despart de Mōsieur, ie vous veu racōter en peu de paroles, la vraye histoire des choses qui auendrēt lors, pour ce qu'il est auis à plusieurs qui ignorēt ce qui en est, que ce Prince deuoit auoir plustost patientē vn petit, que de s'estre mis en la peine ou il se meit. La Cour sembloit toute empelchee aus preparatiues des noces du Sieur de Saint Luc, pour la bonne enuie que le Roy montroit auoir de s'y reiouir, quand on reconut qu'vne contraire passiō s'estoit logee dans le cœur de quelques vns des cortisans plus fauoris, & qu'en vn mot l'on pēsoit à quereller & faire vn mauuais tour à lvn des principaus seruiteurs de Monsieur, à sçauoir au Sieur de Bussi. Et pour ce que l'on ne sçait point, qu'il en eut donné aucune occasion, cela faict penser quelques vns, que la chose venoit de plus haut, que n'est la teste de ceus qui l'entreprenoient. Aussi la façon en est estrange, car il fust-

assailli luy deuzième de dix ou douze à trauers
 desquelz il passa, sans qu'il fust blessé aucunement.
 Le lendemain il demanda raison au Roy d'un tel
 guet à pans: ce qui ne luy fust ni accordé ni refusé,
 ains dilayé de iour à autre, souz couleur de vouloir
 ottroyer le combat. Mais Monsieur voyât qu'on
 estoit venu encor despuis assaillir le Sieur de Bussi
 iusques dans son logis, & que mesmes un grand
 nôbre des Souisses & soldats de la garde du Roy
 y estoient, s'auisa pour le mieus de demander son
 congé, & se retirer pour quelque tans en ses ter-
 res, preuoyant bien que non seulement ces diffé-
 rens ne se passeroient, sans qu'ilz en aueint quel-
 que mal aus siens, ains que luy mesmes en pour-
 roit receuoir du desplaisir & de l'offense, non sans
 troubler le repos de ce Royaume. Mais il eut le
 Roy & la Royne sa mere contraires à ceste siene
 volonté, lesquelz apres auoir taché de l'en dissua-
 der, & auoir toutefois faict semblât de luy accor-
 der son despart, desliberèrent au contraire de l'en
 empescher ouuertement. Et de faict on meit vint
 & cinq ou trante archers de la garde aus portes
 de sa chambre: & fallut que la Royne de Nauar-
 re sa sœur demandast permission au Roy, pour y
 pou-

pouuoir entrer & luy parler. Bref il auent le contraire de ce que l'on estimoit deuoir auenir. Car au lieu de se saisir de ceus qui auoient commis le guet à pans, & qui despuis encor contre l'expres commandement du Roy, auoient bien osé faire amas de gens pour forcer l'outragé dans son logis, on arreste au cōtraire les Sieurs de Buffi & de Cimier, & les baillet on en garde au Sieur de Lossé, avec commandement de ne les laisser parler l'un à l'autre: & quasi en mesme heure, on meine le Sieur de la Chastre à la Bastille. Puis pour ce qu'il ne sembloit pas qu'il y eut assez de preteste, pour passer plus auant, on s'aüse de faire ouurir les coffres du Sieur de Cimier, lequel on scauoit auoir en sa garde les plus secrets papiers de Monsieur, avec esperance d'y trouuer quelque suget d'accusatiō. Mais ces bons cōseillers qui sans aucun respect de l'auenir, estoient cause qu'on offensoit en tant de manieres vn si grād Prince, se trouuerent lors trompez. Car tout ayant esté porté, ouuert, & fueilleté en la chambre mesmes de la Royne mere, & en la presence du Roy, de Monsieur le Chancelier, & du Sieur de de Chiuerni, on n'y sceut apperceuoir ny marq̃, ny tesmoigna

ge d'aucune secrete mencee, ou intelligence, sur laquelle les plus soupçonneuz peussent prendre quelque auantage. Tellement que tous troublez d'estre venus si auât, sans en auoir eu aucune occasion, ilz changerent d'auis miraculeusement, soit qu'ilz craignissêt, que quelque tumulte n'en aueint dans la ville, entédans que tout le peuple, & le Parlement mesmes en murmuroit: ou que Dieu par quelque secrete inspiration les feit sortir des ancienes maximes d'estat, qui ne permettét point d'offenser à demy vn grand Prince. Et en effect ilz penserent deuoir attédre quelque meilleure occasion, & ce pendant pouuoir radoubertout, en feignât le lendemain vne risée de ce qui s'estoit passé, & faisant semblant de n'auoir voulu que donner la peur d'un ieu si malplaisant aus offensez. Voire mesmes le Roy chargea le Sieur de Bussi d'oublier tout ce qui estoit auenu, & se recôcilier avec ses ennemis, sur peine de sa vie. Si que l'on commença de faire des festins comme à tour de bouquet, où les vns & les autres estoient appelez. Ce qui toutefois estoit des caresses fort suspectes à ceus qui auoient esté nagueres si maltraitez. Et m'esbahi cōme ilz penserent pouuoir
faire

faire croire vne telle dissimulation, apres que si
grans & si notables effects, s'en estoient ensuiuiz.
Estimât que c'eut esté vne aussi grande merueil-
le si ce Prince s'y fust arresté, & n'eut taché à se
deliurer de tât d'indignitez, & à rassurer la Fran-
ce qui branloit deia souz la crainte de quelque
grand trouble. Ainsi l'on conoit deia combien
à tort on a cy deuant soupçonné qu'il voulust
remuer quelque chose en l'estat: veu que mes-
mes il ne s'est pas seulement plaint de ses desfa-
ueurs, & n'a pas tellemēt voulu espouser la que-
relle des siens assaillis comme i'ay dit, & guettez
de propos deslibéré, que d'en vouloir importu-
ner le Roy plus auant, pour le respect qu'il por-
te à ses affections & volonteiz: Permettant que
ceus qui ont abusé en son endroit de leurs fa-
ueurs & credit, iouissent de l'assurance que leur
donne l'amitié du Roy, puis qu'il le veut ainsi.
Ce qui doit sembler à tous vne admirable patien-
ce & modestie, car l'on sçait qu'il y a eu souuent
des grans Seigneurs, qui voyans vn lasche tour
commis, prenoient tellement le parti des moins
fauorisez, qu'ilz ne refusoient d'en venir à noise
ouuerte, avec les plus forts & puissans, comme y

estans poussez par l'esguillon du bon droit , qui point tous les cœurs genereuz. Mais tous les hommes en general & de toutes conditions ont pris toujours la deffence , & executé la vengeance des leurs, depuis qu'on les a voulu oppresser, contre toute apparence & raison, comme estimans que telle violence s'adresse à euz mesmes , voire touche & blesse leur personne. De maniere que qui considerera , ce qui est auenu en la personne des Sieurs de Bussi, de la Chastre, & de Cimier; combien de fois , & les vns & les autres se sont employez au hazard de leur vie , pour le seruice du Roy , & en dernier lieu comme au lieu de chastier , ou au moins donner quelque crainte aus coupables d'un tel & si grand trouble , ils furent receuz & logez quasi dans le throne de la Iustice, c'est à dire dans le Palais Royal : celuy la dyie, s'esbahira quant & moy, non tant de la chose que de l'impunité. Mais qui sçaura que ceus la mesmes qui pour le respect que touiours l'on a porté, & à ila tge, & aus branches de la famille Royale, deuoint colorer enuers Monsieur leur entreprise & voye de faict de quelque excuse , se sont au contraire effrontement presentez deuant luy, se van-

tans

sans qu'ilz auoient tué, & tueroient iusques entre
 ses bras ses seruiteurs, voire mesmes fairoint bien
 d'auantage: Et qui d'ailleurs aura esté aduerti com-
 me à ce Prince, coupable nō de quelque crime,
 ains seulement du sentiment qu'il auoit de tant
 d'offenses & torts receus, on preparoit pour bel-
 le & plaisante demeure quelque tour de la Bastil-
 le, vn tel homme dy ie ne pourra trouuer en sa
 fuitte rien à reprendre; Mais bien peut estre en
 sa demeure, comme le voulant accuser par là d'a-
 uoir trop longuemēt patienté, & auoir trop mis
 au hasard sa personne & sa vie, destinee comme
 quelques grans hommes m'ont dit, pour vn iour
 donner à ce Royaume beaucoup d'heur & de
 repos. Mais vous sçauiez ce que ie vous ay raconté
 de sa constance, & de l'enuie qu'il auoit de ne
 faire sans tresgrande occasiō rien qui peut offen-
 ser le Roy son frere, ou qui peut donner aucun
 argument de mesdire de ses conseils & de porte-
 mens. Et pourtant que ce n'est pas petite louenge
 de s'estre aymé biē peu, pour aymer beaucoup au-
 truy. Certainemēt on ne peut dire qu'e vne telle
 façō de retraitte cōme a esté la siēne, il n'apparois-
 se y auoir eu beaucoup de regret, & que ce Prince

n'aye esté bien auant violenté en son esprit de mille facheuses apprehensions , pour se separer ainsi de la personne & cōpagnie du Roy son frere . Mais sur tout il me semble qu'il faut qu'on auoue , voyant les dous effects de son despart & seiour en la ville d'Angers , qu'il ne fust onc touché d'aucune hâutaine & mauuaise pēsee , & que si ces mescontentemens sont aucunemēt à comparer avec ceus qui auendrēt entre le Roy Louis vnzième, & le Duc de Berri son frere, ilz doiuent seruir ainsi que le noir donne lustre à la blâcheur pour faire aussi apparoitre sa naiue bonté & modeste courage. Car nous sçauons , que le Duc de Berri pressa tellement le Roy que pour luy complaire , il esloigna plusieurs de ses seruiteurs & conseillers dont il s'estoit serui auparauant , & si trouuons qu'ez differens qui surueindrent encor despuis entre euz, les princes plus ennemis de ceste coronne y estoient employez. La ou Mōsieur n'a voulu tant s'attribuer que de forcer en aucune maniere, ou offenser les plaisirs & inclination du Roy son frere, & ne luy a iamais faict aucune telle requeste , qui le pressast de se priuer de ceus, dont le seruice luy estoit agreable . Et si en general

ral n'a onc voulu pour fauoriser ses plaintes employer, sinon que sa bouche & l'entremise de la Royne sa mere, portant plus de regret, que l'on sceut l'occasion de sa douleur, que de peine à la tenir secreete. Tellemēt que ie ne fai doute, que ceus qui escriront les choses de ce tans, portans & le gout & l'amour de la verité sur leur langue, auront assez iuste occasion de dementir ce nouuel historiographe du Palais, qui escriuant en Latin la vie du feu Roy Charles, a nommé les troubles qui furent lors de sa mort à la Cour, menees & entreprises faites contre l'estat, par celuy qui tou-tesfois touiour & lors plus que iamais, me semble en auoir esté esloigné, autant que Prince qui fust il y a mille ans en France. Je dy ceci pour ce que nous deuons non tant aus Princes, comme à nostre siecle & à la posterité, la louenge de leurs bonnes & louables actiōs, & mesmes celles qui incitent à moderation. Car cōme il n'y a rien de plus dommageable & pernicieus à vn pais, que l'ambitiō des grans. Aussi n'y a il rien qui doie estre tant vanté, & quasi adoré que le dous & de bonnaire naturel des Princes, qui bornent leurs esperances & volonté par le repos & bon heur de l'e-

stat ou ils se trouuent , & quittent leurs offenses
pour acquerir la bienueillance & benisson de
tous. Je prie Dieu qu'il veuille donner de tels
Seigneurs à tous noz amis , & les oster à noz en-
nemis, & que particulièrement il vous departe,

Monfieur la benisson de ces graces en heureu-
se & longue vie. De Rouan, ce 24. de May, 1578.

F I N.

